

宋代詔令全集

學術顧問

曾棗莊

劉琳

主編

王智勇

王蓉貴

第七冊



四川大學出版社

本書出版得到國家古籍整理出版專項經費資助
國家「二一」工程重點學科建設項目
四川省哲學社會科學「十五」研究項目

宋代詔令全集

主編 王智勇 王蓉貴

第七冊



四川大學出版社

宋代詔令全集卷二九五

官吏拜罷

階官除授

文官階 三一

鄧峒磨勘轉太中大夫制^{〔一〕}

論思班政^{〔二〕}，與庶僚不同；考課法嚴，自近臣而始。具官某古之耆壽俊，今之老成人。屬車在後，鸞旗在前，出而扈蹕；廣廈之下，細旂之上，入而談經。茲陟文階，亦循銓格。積日累月，適成周大計之時；自卑升高，加先漢超遷之秩。可。《後村先生大全集》卷六五。

葉夢鼎磨勘轉太中大夫制

履聲貴近，獨高獻納之班；銓法森嚴，尤重超遷之秩。具官某璞玉渾金之器質，光風霽月之胸襟，出屢擁於節麾，人徧儀於筆橐。韓愈奏從官之技，無愧詩書；綺季從吾兒之遊，有功儲貳。然其序進，必以年勞。噫！周室設官，既長六卿而率屬；虞廷考績，適當三載之陟明。可。《後村先生大全集》卷六五。

謝堂爲磨勘轉朝散大夫制^{〔三〕}

候對之班，尤於天近；審官之法，必以年勞。具官某相關

挺生，天材軼出。偉中殿謙沖之德，倡外家損挹之風。巨鎮名藩，退而袖輪扁之手；珍臺閒館，超然拍洪崖之肩。然考課之法尤嚴，雖論思之臣不廢。面四松於奎閣，密邇清光；加一秩於冰銜，欽承新渥。可。《後村先生大全集》卷六五。

包恢磨勘轉中奉大夫制

六典設二卿，春官尤重；三年計羣吏，古制則然。具官某異聞佩嚴考之緒餘，精義聆先師之聲歎。帝曰伯夷典禮，咨汝欽哉；子與卜商言詩，起予可矣。雖當代耆英之望重，然有司考課之法嚴。噫！夙夜寅清，既班高於兩禁；日月積累，姑序進於一階。可。《後村先生大全集》卷六五。

知建昌軍魏時職事脩舉轉朝請郎制

朕覲名實而嚴殿最^{〔四〕}，於郡國長吏稍汰其饜墨而罷輒者^{〔五〕}，其有以廉能自著見，必尊顯之。爾相家子，牧名城，無嚴刑峻令而雄狡服，不巧取豪奪而財用足，其士皆曰待我有禮，其民皆曰拊我有恩，一郡之廢者興，蠱者飾，朕聞而嘉之。夫陟明舜典

〔一〕 鄧峒：按《後村先生大全集》卷六七有《鄧峒除權吏部侍郎制》，字亦作「峒」，然卷六三、六四、六七均有鄧峒除官制，「峒」當爲「峒」之訛。鄧峒建昌人，官至吏部侍郎，見《萬姓統譜》卷一〇九、正德《建昌府志》卷一六等。

〔二〕 政：疑當作「峻」。

〔三〕 爲：字疑衍。

〔四〕 「朕」下原有「核」字，據翁同書校秦氏石硯齋抄本刪。

〔五〕 汰：原作「法」，據翁同書校秦氏石硯齋抄本改。

也，增秩漢制也，爾既能善其始，又能不倦以終之，則可以對揚休命矣。可。《後村先生大全集》卷六五。

周坦磨勘轉朝請大夫制

漢家聽履之班，在廷莫及；虞朝考績之法，歷代通行。具官某琅琅然董子天人之篇，炳炳乎陸贄仁義之諫。雖藩條宣布，被陽春之澤而光輝；然官閥推遷，計日月之勞而積累。屬當會課，爰命出綸。噫！台斗八座之高，卿維達貴；冰銜一階之陟，予非濫恩。可。《後村先生大全集》卷六五。

朝奉郎家遇以脩浚靜江府城池轉朝散郎制

先朝既平儂寇，首城桂州，厥後承平日久，城圯塹湮，恃陋不戒。爾佐閫幕，能與將士叶力築浚，一旦寇至，卒能與城俱全，可以言智矣。俾進一秩，以酬前勞。可。《後村先生大全集》卷六七。

奉議郎何鑄以修築廣州城轉承議郎制

屬者西寇震鄰，東廣戒嚴，城番禺乃所以援桂林、象郡而安扶胥、黃木也。爾佐閫幕，倡率吏士，躬板幹之役，成金湯之勢。帥臣上其賢勞，其可以吝賞哉！可。《後村先生大全集》卷六七。

全允堅補承務郎直秘閣制

朕爲儲宮選嫡妃，既告廷且成禮矣，加惠於妃之同產，親親

之義也。爾早孤而嗜學，與女兄昔同其憂，今同其樂，不亦宜乎！初補爾直中秘，不試而擢幕賓^(一)，是惟優恩。益勉進修，以基遠大。可。《後村先生大全集》卷六六。

殿撰都承旨陳綺磨勘轉中大夫制

導旨之班，貳卿接武；考績之法，三載陟明。具官某敷歷最深，行能尤異。與聞朝算，實參夙夜宥密之司；自結主知，遂寘朝夕論思之地。既平躋於兩禁，初何羨於一階！噫，先秦古官，蓋朝廷之所重；成周大計，雖貴近而必行。益勵猷爲，欽承恩渥。可。《後村先生大全集》卷六六。

武功大夫帶行御器械前改差知江陰軍張稱孫特

換朝奉郎制

朕於疏遠羈旅之臣有能以才學自著見，往往度越拘攣，拔擢而任使之，況其親近者哉！爾文恭之甥，嗜學工文，再領漕薦，嫺雅風流，一時籍甚，縻以勇爵，非其志也。顧官品已崇，且佩貳千石印綬矣^(二)，換班之命，蔽自朕心。雖員外之秩稍卑，然郎監之選甚清，先朝如米芾、如吳玕，皆以肺腑之親而擅詞翰之

(一) 濫：原作「監」，據翁同書校秦氏石硯齋抄本改。

(二) 承：原作「丞」，據翁同書校秦氏石硯齋抄本改。

(三) 幕：原作「慕」，據翁同書校秦氏石硯齋抄本改。

(四) 改差：原作「改羞」，徑改。又「稱」字原脫，據翁同書校秦氏石硯齋抄本補。

(五) 且：原作「日」，據翁同書校秦氏石硯齋抄本改。

美，爾其勉哉，以對殊渥。《後村先生大全集》卷六七。

包恢磨勘轉中大夫制

秩宗之官，極寅清之高選；考課之法，必積累而序遷〔一〕。具官某世之達尊，國之大老，持橐入侍已八十餘，焚藁盡規凡再三告。士論咸推其晚節，吏銓適會其年勞，爰出新綸，俾升華秩。噫！周小宗伯，初豈計於一階〔二〕；秦中大夫，今遂班於五品。《後村先生大全集》卷六七。

承議郎范昌世牙契賞轉朝奉郎制

中興以來，養兵之費廣，生財之道狹，而牙契所入遂爲國之大利，與筦榷並行。爾淳熙名執政之孫，善於其職，課以最聞，豈非會稽當而然歟！俾進郎秩，以旌賢勞。可。《後村先生大全集》卷六七。

迪功郎鄭立道循承直郎制

鹿磯之捷，蓋吾上相指授，亦師武臣力也。幕府上功，爾以書生有勞其間，如格進秩，以勸來者。《後村先生大全集》卷六七。

從政郎廣東提刑司檢法官林祖恭以韶州築城賞

循文林郎制〔三〕

屬者蠻韃深入，韶甚岌岌矣，爾佐臺幕，能與將士協力增障浚壕〔四〕，隱然有不可犯之勢。憲臣言狀，薄進一資，以旌爾勞。可。《後村先生大全集》卷六七。

呂文煥特授中大夫亳州防禦使依前職任制〔五〕

敵王所懷，既斬馘而獻俘；振旅而還，乃策勳而舍爵。具官某見推動閭，蚤總戎昭，傳授六韜而起家，間關萬里而赴援〔六〕。朕拊髀思名將，一掃兵氛；爾束髮戰匈奴，屢騰凱奏。宜加品秩，以獎忠勞。噫！花卿絕世之才，孰如英槩；鉞虎百夫之禦，雅稱使名。可。《後村先生大全集》卷六七。

朝奉郎謝奕懋以前任都大解發新錢綱及數轉朝

散郎制

冶鑄歲以十五萬緡爲額，及額者賞，其來久矣。爾建鎔臺，善於其職，新錢源源暴暴而至。有司上其功狀如格，乃遷華秩，以旌賢勞。可。《後村先生大全集》卷六七。

朝散大夫謝堂磨勘轉朝請大夫制

侍漢雍之祠，特高候對〔七〕；考虞廷之績，可緩陟明？具官某風致幼興，才華康樂。授鉞建牙於馮翊，焜耀繡行；簪筆持

- 〔一〕 累：原作「案」，據翁同書校秦氏石硯齋抄本改。
- 〔二〕 原重一「豈」字，據翁同書校秦氏石硯齋抄本刪。
- 〔三〕 從：原作「政」，據翁同書校秦氏石硯齋抄本改。
- 〔四〕 障：原作「俾」，據文意改。
- 〔五〕 毫：原作「毫」，徑改。
- 〔六〕 援：原作「授」，據文意改。
- 〔七〕 候：原作「侯」，據翁同書校秦氏石硯齋抄本改。

橐於甘泉，雍容綵戲。雖在列莫如其貴近，然還官不廢於故常。噫！奎閣歸然，固已班於兩禁，冰銜清甚，初何計於一階！可。《後村先生大全集》卷六七。

史能之貞州分權倍增轉朝奉郎制^(一)

宿師於邊，財殫粟竭，朕知筦樞之病民而未能弛也。爾以選往洩其事，所入倍蓰，然未嘗有析秋毫之謗，可謂才矣。晉秩外郎，益勉事功。可。《後村先生大全集》卷六七。

吳勢卿羅足五十萬石特轉朝奉大夫制

連營待哺，倉庾氏無以繼，至於羅以足之，勢不容已，非得已而不可已也。然羅固難，而羅於歉歲尤難。爾承澤竭之餘，當水毀之後，招誘有方，措置得宜，無疾聲大呼，不低估高量，而歲額五十萬斛告足。世之自詭功名者多能言，惟爾能踐其言，信乎有勞於國矣。其進一階，以勸使於四方不辱君命者。可。《後村先生大全集》卷六九。

奉直大夫新差知泰州姜虎臣昨因應援懷遠以解

重圖特轉朝議大夫制

懷遠吾必守之地，寇環而攻之，爾以制閫元僚提兵赴援，突圍而入，解圍而出。昔有上馬擊賊，下馬草檄者^(二)，其若人之流歟！閫臣言狀，進階一列，以勸功名之士。可。《後村先生大全集》卷六九。

呂文德特授開府儀同三司依前保寧軍節度使京湖安撫制置大使四川宣撫使兼知鄂州兼湖廣總領霍丘郡開國公加食邑食實封制 景定三年

二月十六日壬寅^(三)

門下：朕覽周家戎捷之詩，興師而討叛，考漢代儀同之制，出爵以賞功。眷言宣力之臣，方上獻俘之奏，其數大號，以告廣廷。具官某挺特起之英豪，撫方來之事會。韜略傳渭濱之叟，不假兵書；聲名與吳下之蒙，相輝族譜。夷險一致，經營四方。築砦而思、播之備嚴，燔梁而嘉、渝之圍解。信拜大將，蓋從蕭相之言；度朝京師，代領蔡方之任。塞北之塵不驚，漢東之水無波。屬整亂常，櫻城旅拒。孰肯徇國家之危急，俾就開幕府以旬宣。過師緣魚貫之崖，轉鬪萬里；漕粟泝馬高之峽，屢費千金。此推鋒賈勇而前^(四)，彼漏刃游魂而遁。視諸葛渡瀘之舉，何其壯哉；自崇文克關以來，未之有也。金湯險在，笳鼓凱旋。再安參井之墟，壹洗岷峨之侵。陣堂堂，旗正正，卿既累於戰多，緩若若，印纍纍，朕猶慙於賞薄。昔者聞皇祖之訓，尤其靳使相之官，以此褒崇，寧非稀闊？於戲！李愬破賊城而

^(一) 貞州：按宋無此州，疑是「真州」之誤。又「分」，翁同書校泰氏石硯齋抄本改作「司」。

^(二) 下：原作「上」，據翁同書校泰氏石硯齋抄本改。

^(三) 年月日據《宋史全文續資治通鑑》卷三六補。

^(四) 賈：原作「價」，據翁同書校泰氏石硯齋抄本改。

人，益著威聲^{〔一〕}；曹彬平僭壘而歸^{〔二〕}，不忘謙謹。勉旃忠力，對越寵光。可。《後村先生大全集》卷五四。

朝請大夫試尚書兵部侍郎洪勳磨勘轉朝議大夫

制

磨勘法行^{〔三〕}，由三百六旬而積^{〔四〕}，論思望峻，何八十一士之拘。具官某忠清之節傳家，典雅之文行世。於高原下隰，歌《皇華》而周咨；扈法駕屬車，第侍臣之嘉頌。雖班爵極顯榮之寵，然銓衡有考課之常^{〔五〕}。乃出新綸，俾遷崇秩。噫！佩荷囊而從上，寧計官資；對蒲壁以封男^{〔六〕}，仍開鄉國。可。《後村先生大全集》卷六九。

寶章閣直學士朝請大夫知徽州軍州事周坦磨勘

轉朝議大夫制

磨勘法行，由三百六旬而積；論思望峻，何八十一士之拘。具官某貴名揭日月而行，諫紙挾風霜之氣。聽尚書履，冠常伯之邇聯；懷太守章，踐先儒之補處。雖班爵極顯融之寵，然銓衡有考課之常。乃出新綸，俾遷崇秩。噫！佩荷囊而從上，寧計官資；對蒲壁以封男，仍開鄉國。可。《後村先生大全集》卷六九。

叙復朝請郎新除華文閣待制改差知太平州軍州

事潘凱磨勘轉朝奉大夫制^{〔七〕}

國家待法從之臣，固難用例；祖宗立審官之制，必論積勞。

具官某有萬丈光燄之文，有百篇仁義之諫。持橐陪甘泉之獻納，入聲忠嘉；建牙護采石之風寒^{〔一〕}，出分憂顧。然考課其來尚矣，雖貴近何可廢哉！乃下新綸，俾遷華秩。噫！見德業之久大，益懋遠圖；計班資之崇卑，諒非雅志。可。《後村先生大全集》卷六九。

常挺唐鑑徹章轉朝議大夫制

朕高拱燕間，博延鴻碩。以古爲監，文皇言炳於蒼龜；其人若存，太史論嚴於衮斧。茲及徹章之際^{〔二〕}，載嘉執卷之勞。具官某色夷而氣和，德盛而仁熟。以少常伯，兼中書君。今進讀邇英之編，昔授說先賢之作^{〔三〕}。朕率光堯聖訓，寶之尤甚諫書；卿於祖禹格言，合者殆如符券。顧涼德方資於三益，考舊章宜陟於一階^{〔四〕}。噫！覽貞觀金鏡之書，唐祚所由興也；陳永平印綬之賜，漢儒不亦鄙哉！尚賴交修，勉殫忠告。可。《後村先生大

- 〔一〕 聲：原缺，據翁同書校秦氏石硯齋抄本補。
- 〔二〕 平：原缺，據翁同書校秦氏石硯齋抄本補。
- 〔三〕 法行：原倒，據翁同書校秦氏石硯齋抄本乙。
- 〔四〕 由：原作「田」，據翁同書校秦氏石硯齋抄本改。
- 〔五〕 「然」下原有「考」字，據翁同書校秦氏石硯齋抄本刪。
- 〔六〕 對：翁同書校秦氏石硯齋抄本作「出」。
- 〔七〕 待：原作「侍」，徑改。
- 〔八〕 采：原作「果」，據翁同書校秦氏石硯齋抄本改。
- 〔九〕 徹：原作「澈」，據本文標題改。
- 〔一〇〕 之：原作「而」，據文意改。
- 〔一一〕 考：原作「故」，據翁同書校秦氏石硯齋抄本改。

全集》卷七〇。

文林郎楊潮南盜賞循儒林郎制

乃者盜起寧遠，延及零陵，二邑之民騷然失寧。既而遂討平之，雖閭臣之功，亦幕僚之助，爾潮南與焉。其進一資，以獎爾勞^(一)。可。《後村先生大全集》卷七一。

董槐特授特進依前觀文殿大學士許國公致仕加

食邑食實封制

景定三年六月十五日己亥^(二)

門下：宅百揆以當朝，嘗著奮庸之效^(三)；辭三公而就第，忽騰告老之章。耄期久薄於宦情^(四)，輿論尤高其晚節^(五)。咨爾在列，聽予敷言。具官某研幾而極深，守約而施博。凡所植立，得之講明^(六)。伊洛之書盛行，獨以身而體蹈；莘渭之事雖遠，常望古而慷慨。堂堂玉帳之折衝，壞壞銀臺之批敕。借旋幹洪鈞之日遠，然流傳黃閣之風清。孔明如秤之心^(七)，居然服衆；儀休拔葵之操，端可矯貪。既釋化權，益窮性學^(八)。尋故鄉之游釣，却長樂之麾幢。物外逍遙，方且挹浮丘之袂；世間屈曲，遂求挂弘景之冠。念頃位於冢司，蓋超加於特進，易封舊許，仍拓新畝，以慰巖石之具瞻，以旌急流之勇退。於呼！鴻飛歸公無所^(九)，豈如就國之安；龜厭不我告猷，殊匪愛君之義。雖云謝事，尚冀輪忠。可。《後村先生大全集》卷五四。

呂師夔特與換朝奉大夫詔

景定四年九月十八日

呂文德乞以大禮所得京官恩澤改奏次子夔^(一)，已從其請。

朕思文德忠勤，豈在中興功臣之下，師夔已除知閣，且屢典邊郡，但換京官，亦非朕所以待忠臣之意，今特與換朝奉大夫。《宋史全文續資治通鑑》卷三六。

端明殿學士正奉大夫簽書樞密院事兼權參知政事兼太子賓客楊棟宣奉大夫加恩制

朕永惟邦本，肇建儲闈。首招綺園，領四人而入侍；旋倚望夷，參三少以與游。荐逢華臺之周，宜峻穹階之陟。蓋念終始典於學，豈積日月以爲功？是彰綸綍之新，式獎範模之舊。具官某，德直方大，學純粹精。選衆舉臯陶，暨益稷而同列；敬王如孟子，非堯舜以不陳。吾求千載而上之真儒，欲起三代以前之善政。與賢者共，方將築太平之基，從吾兒游，又以翼仁孝之德。琢磨令範，斧藻大猷。豈無端人正士之後先，道之教訓，必有元老大臣之領袖，重於典刑。賢聖藹聞，溫文炳著。時考則可矣，適觀三年之成；爵與爾縻之，何辭一秩之寵？仍增陪於

- (一) 獎：原作「榮」，據文意改。
- (二) 年月日據《宋史》卷四五《理宗紀》補。
- (三) 奮：原作「舊」，據翁同書校秦氏石硯齋抄本改。
- (四) 情：原作「清」，據翁同書校秦氏石硯齋抄本改。
- (五) 論：原作「輪」，據翁同書校秦氏石硯齋抄本改。
- (六) 得：原作「德」，據翁同書校秦氏石硯齋抄本改。
- (七) 科：原作「稗」，據翁同書校秦氏石硯齋抄本改。
- (八) 性：原缺，據翁同書校秦氏石硯齋抄本補。
- (九) 飛：原無，據翁同書校秦氏石硯齋抄本補。
- (一〇) 「夔」上當脫「師」字。

并賦，併申錫於渙綸。以昭殊恩，以獎懋績。噫！春秋冬夏無非教，既酬歲會之庸；師保疑承惟其人，更覲日新之益。尚資鴻翼，以永燕詒。可。《碧梧玩芳集》卷六。

朝議大夫寶章閣待制江西運使知隆興府洪熹磨

勅轉中奉大夫制

國家品式備具，莫嚴八柄之權；侍從獻納論思，亦考三年之會。肆陞卿秩，以寵禁塗。具官某，風猷敏明，材業雋茂。一翁二季，相承文字之傳；三江五湖，尤稔政聲之美。若稽積閔，爰進穹階。於簪筆持橐以有華，與增秩賜金而何異？噫！授官而累日月，有愧待賢；聞問而對《春秋》，式觀奉最〔一〕。可。《碧梧玩芳集》卷五。

太中大夫兵部尚書兼直學士院兼修玉牒官兼侍

讀洪勳特授通議大夫依前職制

鏤白玉之牒，迄奏鉅編；易黃門之階，式躋顯秩。宜有揚綸之寵，以增曳履之榮。具官某，學深孔孟之淵源，詞挾卿雲之河漢。尚書踐台斗，峻居古納言之官；國朝盛文章，獨擅大手筆之作。有三長譽，成一家言。予懷帝籍之登閱，爾率儒紳而纂輯。大事書之策，適觀厥成；衆美效之君，煥焉可述。序進其等，式遵乃彝。噫！偉績編詩書，視六經而無媿；大夫掌論議，增一秩以何辭？既好爵之爾縻，尚嘉猷之我告。可。《碧梧玩芳集》卷四。

呂文德特授少保職任依舊加食品實封制

朕紹丕圖，睠時英傑。屬大事當一面，久著績於幹方；立少保曰三孤，首疏恩於進律。況輯瑞於頒朝之日，乃聽輦而思帥之初。爰簡剛辰，誕敷列辟。具官某，沈雄有守，英果無前。家傳籌略於渭濱，世擅勳名於江表。左護軍陳計納策，下南郡以定荊州；大司馬清身奉公，分武昌以督右部。豈其苗裔？念茲戎功。頃清漢鄂之氛埃，再洗岷峨之悽愴。據荊出益，未嘗忘北方之圖；首蜀尾吳，亟欲重上流之勢。錫之雙節，整我六師。足食足兵，惟征惟築。寇行如鬼，臨江復擬於投鞭；將通於神，答敵不勞其折箠。茲歲華之晏粲，喜邊信之平寧。朕臨涖方新，佇毗維舊。惟孝祖初膺於大統，惟吳璘特表於殊庸。繡紱在裳，煥貳公之典冊；珣戈導節，兼舊鎮之威儀。申衍戶封，陪當邑采。壯矣軍容之重，煥乎命數之隆。式循昭代之彝章，勿替先皇之殊遇。於戲！惟明於任人者善繼其志，惟忠於事主者不貳其心。歷觀古人，可驗今日。周亞夫將兵再世，迄能守節以有勳；郭子儀受命先朝，惟以效忠而永譽。予欲固封疆之備，爾思承閔閱之勞。茂對寵光，益恢遠略。可。

賜告口宣

卿久專閫寄，克靜邊虞。昨開兩鎮之雄，茲陟貳公之峻。體予初服，祇我明綸。《碧梧玩芳集》卷六。

〔一〕奉：似當作「奏」。

王應麟轉朝奉郎制

景定五年十二月

生民立君，故尊居於大寶；惟辟作福，斯溥錫於湛恩。茲予一人踐阼之初，是人臣委質之始，粵從京秩，遞進華階。臣事君以忠，宜勤厥職；官量能而授，嗣選爾勞。《深寧先生年譜》。

趙葵特授少傅依前觀文殿大學士充醴泉觀使翼

國公加食邑食實封仍令所司擇日備禮冊命制

咸淳元年二月三日

門下：朕祗通燕謀，丕承鴻業。祐民作君而相上帝，惟懷永圖；貳公弘化而弼一人，式序在位。瞻言碩望，首錫茂恩，晉左棘之穹班，渙大廷之顯冊。少傅具官趙葵，寬闊而肅括，俊偉而光明。文武憲於萬邦，有應變折衝之略；忱恂迪於九德，有庇民尊主之心。出則秉斧鉞以董師，入則踐樞衡而穆綽。謙謙終吉，蹇蹇匪躬。願從赤松，進退合於禮義；非謂喬木，老成重於典刑。肆予紹休，若古訪落。追先帝之遇，諒懷欲報之忠；貽哲命之初，靡忘用德之訓。誕敷沛澤，可後耆英！昔寧皇之登至尊，命必大而升亞傳。有嘉雅操，允蹈前聞。夏篆通壇，峻躋特揖，祥源使組，仍冠延恩。增多邑於采封，衍真畬於圭食。以篤股肱之舊，以昭體貌之隆。於戲！世服勞，紀於大常，夙懋屏毗之績；身雖外，心在王室，尚遵寅亮之謨。永肩遠猷，益介純嘏。可。《四明文獻集》卷四。

程元鳳特授少保依前觀文殿大學士充醴泉觀使

新安郡開國公加食邑食實封仍令所司擇日備

禮冊命制

門下：朕仰惟前代訓官，莫重貳公之任；永言孝思嗣服，聿懷有佐之賢。寅紹丕圖^(一)，恪遵成憲。仁沾恩洽，用大賚於善人；謨明弼諧，實勸相於烈考。晉班孤棘，孚號明廷。特進具官程元鳳，德厚而器閎，學醇而識邃。浩然養以直，盡責難陳善之恭；休焉如有容，得持美效君之體。輔贊而藏諸用，動靜不失其宜^(二)。藹聞藩翰之庸，自適丘園之佚。訪予落止，敷時繹思。惟舊人知若勤，所以報先帝；有嘉猷則人告，罔不祗師言。繫我碩儒，可無異數！昔孝皇之盛際，重亞保之殊榮。臣浩以耆英而叙升^(三)，俊卿以宿望而延拜。茲率厥典，載錫之光。絺冕篆車，峻外朝之特揖；珍臺閒館，仍秘殿之隆名。申培采邑之封，益衍圭畬之實。非惟沾渥，式示褒章。於戲！罔以寵居成功，久遂伊尹告歸之志；在厥初貽哲命，無忘召公爲保之規。克邁前修，永綏多祉。可。《四明文獻集》卷四。

(一) 四庫本、清抄本於「寅」字前有「朕」字。

(二) 宜：四庫本、清抄本作「時」。

(三) 耆英：四庫本、清抄本作「耆彥」。

謝方叔特授特進依前觀文殿大學士惠國公致仕

加食邑食實封制

門下：嗣德罔不在初，惟忠厚爲家法；舊人不克遠省，惟爵齒爲達尊。顧予續圖，爰命施惠〔一〕。敬休億萬載，燕及皇天；咨爾二三臣，既右烈考。乃瞻垂車之佚，誕膺錫位之榮，繹於師虞，敷以渙號。金紫光祿大夫具官謝方叔，閱深而耆艾〔二〕，忱裕而粹夷。經德不回，凜松柏後凋之操；秉心無競，參珪璋特達之純。曩宅揆以奮庸，善守文而持正。仲山之明且哲，以保其身；孟軻之致爲臣，皆有所式。行願素履之吉，受祉黃髮之宜。法空谷之自持，藐浮雲之何慕？惟今立政，稽古尚賢。未遑設几以須，若仁祖遇衍之禮；必有進官之寵，若哲廟待絳之彝。聯華一品之階，冠序羣公之表。適觀故事，實非上宰以不除；用獎耆儒，庶乎清風之咸聳。仍延恩之選職〔三〕，增奉邑之新畬。於戲！踐阼而問丹書，朕既迪周王之訓；箴國而作懿戒，爾益逾衛武之年。俾壽而臧，有猷則告。可。《四明文獻集》卷四。

呂文德依前少保寧武康軍節度使荆湖安撫制置大使屯田大使兼四川策應大使兼荆鄂州軍州事兼管内勸農營田使兼侍衛馬軍都指揮使霍丘郡開國公加食邑七百戶食實封三百戶制

門下：朕祗承景命，懋敬肇禋。定郊祀而允集壇，稽正月於漢典；見宗祖而躬執禮，參元日於唐儀。乾度昭清，坤儀肅

穆。聞金支羽林之樂，時則興鼙鼓之思；觀玉路辰旂之容，時則念旂常之績。既輯斂柴之貺，趣申位棘之褒。揚於听庭，敷我餞澤。具官某器資閎毅，志槩忠純。來旬來宣而告成，協濟攘夷之略；有嚴有翼而共武，屢書敵愾之勳。乃兼雙節之榮，乃踐貳公之列。討軍實而申傲，克壯其猷；未陰雨而綢繆，以固吾圉。朕惟除戎斯致孝享，治外可告神明。幸甘泉弭夕烽之虞，而參旗馳月捷之奏。蓋以本強於荆土，用能表拓於蜀疆。於救圖功，其綏多福。茲庸加勞而賜胙，亦如相祀之執膳。爰賦增封，真奮衍食。於戲！觀羣牧而班瑞，朕率循肆類之初；敏戎公而錫田，爾尚迪對揚之祉。益恢茂烈，永乂嘉師。可。《四明文獻集》卷四。

賈似道依前太師鎮東軍節度使魏國公醴泉觀使兼侍讀仍奉朝請御批

咸淳元年五月十八日丙戌〔四〕

賈似道援引故事，毅然去國，極力勉留，累疏懇切，渡江歸里。其以數從臣宣召者亦既至再，親筆由庚置往者日不下六七，端殿從臣朝列今已八遣。回闕之期未聞，納祿之請隨至。所賴師相力勉陳請，又必以得祠爲期。予亟欲師相之還朝，姑爲雅志之是徇。可依前太師、鎮東軍節度使、魏國公、醴泉觀使、兼侍

〔一〕 爰：原作「受」，據四庫本、清抄本改。

〔二〕 耆艾：四庫本作「肅艾」。

〔三〕 還：四庫本、清抄本作「遂」。

〔四〕 年月日據《宋史》卷二一四《宰輔表》五補。

讀，仍奉朝請，令學士院降制。《咸淳遺事》卷上。

方逢辰轉朝散大夫誥

咸淳元年六月一日

敕朝奉大夫、新除司封郎官方逢辰等：生民立君，既尊居於大寶；惟辟作福，斯溥錫於湛恩。茲予一人踐祚之初，亦爾羣臣委贄之始。粵從京秩，遞進華階。臣事君以忠，宜勤厥職；官量能而授，嗣選爾勞。方逢辰可特授朝散大夫、行尚書司封郎官。《蛟峰外集》卷一。

王應麟經筵進讀孝宗寶訓終篇轉朝請郎制

咸淳三年十一月

歷代寶爲訓，於皇烈祖之謨；三王惟其師，允賴儒臣之益。爰肆開於經幄，用祇若於先猷。亦既徹篇，可後褒典？爾學博而有守，文贍而不浮。談經得聖人之微，摘辭鼓天下之動。琅然細耗之講誦，秩若成憲之昭明。予欲率由舊章，爾惟訓於朕志。進升華序，將大多聞。治願力行，敢替詒謀之德；學無止法，尚庶藥石之忠。《深寧先生年譜》。

呂師夔超授朝奉大夫除正郎差遣御筆

咸淳三年

朕思文德忠勳，豈在中興功臣下，宜與此授，而師夔已知閭門事，且屢典開闢，綽著聲稱。其守漢陽，實當曹世雄聞變棄城之後，委有奇節，非其他保任比，若祇換授京官，不但師夔積階累功竟成虛擲，亦非朕所以優待忠勳之意。畀自特恩，超授朝奉大夫、除正郎差遣。《咸淳遺事》卷上。

方逢辰轉朝議大夫誥

咸淳四年六月十三日

敕朝請大夫、秘閣修撰、權江南東路提點刑獄公事兼本路勸農、提舉河渠公事、提舉弓手寨兵方逢辰：在仁宗朝有若韓琦、實進士第二人也，平日循循若不能爲，逮帥真定，捍驕挺亂，琦獨凝然不動，舉士卒而殲焉。謂儒者不知兵，可乎？爾以先朝倫魁之彥，司臬江東，會上饒有脫巾之變，乃能拔取二士，布之州縣，密伺姦謀，以俟機會，卒致草薶而禽彌之，可謂儒效章章矣！論功行賞，爰進一階。陞躋六品之榮，以爲元士之望。可特授朝議大夫、依前秘閣修撰，差遣如故。《蛟峰外集》卷一。

王應麟轉朝請大夫制

咸淳八年三月

禮說莊敬恭儉，具存載籍之間；學有緝熙光明，允賴羣儒之助。屆時竟帙，懋賞有彝。爾業履粹□，文章蔚贍。螭坳載筆，仍參讞約之司；虎觀談經，□有切磨之益。乃若漢儒之《禮記》，無非孔氏之格言。三百三千，儀文悉備；多聞多見，考論無遺。雖明道未嘗計功，然用德所以彰善。特頒褒頌，爰進文階。大夫執圭，取彼春朝秋請之義；從臣第頌，弘我上嘉下樂之規。《深寧先生年譜》。

高達特授少保依前寧江軍節度使左金吾衛上將軍荆湖北路制置副使兼安撫使馬步軍都總管兼知江陵軍府事兼管內勸農營田使節制本府屯戍軍馬固始郡開國公加食邑食實封制〔一〕

德祐元年二月甲辰〔二〕

門下：朕倚重上游，圖寧多難。命率以衛中國，佇聞執訊之勳；式公而弼一人，允迪保邦之訓。酌勞進律〔三〕，孚號揚廷。某雄深而尚謀，福艾而持重。廉頗爲將，豈憂匈奴哉；充國善兵，無踰老臣矣。名著峴山之草木，計安鄂渚之金湯。慨彼相之忌功，不能早用；迨我圉之孔棘，未嘗辭難。命以江滸告成於王，鎮於荊州用武之國。憤蝨賊搖我疆之慘，投鞭斷流；恃熊羆不二心之臣，若防制水。元戎十乘，以禦侮於危急；二矛重弓，以協力於旬宣。維樞臣趨勤王之行，而闔寄專守圉之任。東連吳、西連蜀，爾爲長城；卯受詔、辰出師，爾紹前烈。俟《采薇》三捷之奏，躋位棘亞保之班。在昔世忠暨於張俊，皆自儀同而序陟，用勸殊庸；今以校聯而真除，時惟茂渥。蓋注意隆則恩必厚，錫寵優則功可期。衍食真畬，增光齋鉞。於戲！曄曄戎車，方叔率止，朕有嘉克壯之猷；烈烈征師，召伯成之，爾尚集既平之績。祇承異數，懋建膚公。可。《四明文獻集》卷四。

〔一〕「總管」下原有「府」字，「節制」下原有「知」字，並據四庫本、清

抄本刪。

〔二〕年月日據《宋史》卷四七《瀛國公》補。

〔三〕酌：四庫本、清抄本作「醕」，義長。

宋代詔令全集卷二九六

官吏拜罷

階官除授

武官階 一

曹彬宣徽南院使義成軍節度使制

乾德五年正月丁巳

策勳欽至，《春秋》之格言；褒德賞功，國家之彝典。其有董齊軍旅，戡定土疆，爰念勤勞，宜加寵數。內客省使曹彬，夙聞詩禮，頗厲忠貞。沈厚有謀，強明善斷。久踐軒墀之列，彌堅金石之誠。昨者問罪巴庸，分兵夔峽。護其戎事，督彼征行。奉辭統王者之師，制勝曉兵家之法。而能動遵成算，不犯秋毫。有次公撫士之方，無陳平受金之謗。古之良將，何以加焉！是用不次推恩，即時懋賞，俾升近列，仍殿大藩。內隆三接之知，外總十連之柄。於戲！無德不報，宜保於令名；作善降祥，勉思於自效。服我休命，汝其欽哉！可特授宣徽南院使、行滑州刺史、充義成軍節度使。《宋大詔令集》卷九四。

江南進奉使李從善泰寧軍節度使制

開寶五年閏二

月癸巳

爵賞之設，所以勸忠；藩屏之寄，適彰無外。睠惟江表，

夙奉朝經，每竭勤王之誠，尤恭事大之禮。屬朕新平南越，再祀上玄，命同氣以入朝，備充庭而助祭。雷雨均覃於慶澤，旌幢宜被於明恩。江南進奉使李從善，和順積中，孝友成性。稟先正義方之訓，叶詩人愷悌之稱。爰受教於乃兄，來獻琛於上國。苞茅入貢，既伸述職之心；胙土分封，是委殿邦之任。矧惟充海，素號奧區，俾資鎮撫之才，豈恡便蕃之寵。上公亞相，用示兼榮，當體睠懷，勉思佩服。可特授光祿大夫、檢校太傅、使持節兗州諸軍事、行兗州刺史、兼御史大夫、上柱國、充泰寧軍節度使、兗沂等州觀察處置等使，仍封隴西郡開國侯，食邑一千戶。

《宋大詔令集》卷一〇三。

孟玄喆定武軍節度使崔彥進河陽三城節度使制

太平興國二年十一月

門下：王者出綸宣命，易地畀恩，用旌鎮撫之勞，特示便藩之寵。況中山名部，河上要津，苟非守土之良臣，豈副分茅之重寄！推誠保順翊戴功臣、永清軍節度、貝州管内觀察處置等使、特進、檢校太師、使持節貝州諸軍事、行貝州刺史、兼御史大夫、上柱國、平原郡開國公、食邑三千五百戶、食實封一千戶孟玄喆，鸞鳳秀質，珪璧清輝，孤虛素練於戎機，寬猛善通於民政。推誠奉國忠貞翊戴功臣、彰信軍節度、曹州管内觀察處置等使、金紫光祿大夫、檢校太師、使持節曹州諸軍事、曹州刺史、兼御史大夫、上柱國、清河郡開國公、食邑二千七百戶、食實封二百戶崔彥進，鷹鸇俊氣，干鎔雄銳，橫戈早負於壯圖，躍馬常摧於堅陣。而皆明誠自許，亮節無渝。山河分屏翰之憂，竹帛著

勤勞之節。佐子昌運，咸竭忠規。是宜降雨露於明廷，改節旄於雄聞。資爾惠民之政，體予求理之懷。欽哉二臣，無替朕命。

可。《宋大詔令集》卷一〇三。

劉繼元授保康軍節度使制

雍熙三年十二月癸丑

門下：無黨無偏，是稱於王道；有始有卒，方謂於聖人。

朕稽彼古先，恭臨大寶，遵創業守文之理，思棄瑕用大之言。申彼至公，告於有位；爰詢剛日，利建元侯。開府儀同三司、檢校太保、右衛上將軍、兼御史大夫、彭城郡公劉繼元，頃在并門，隱爲敵國。干戈問罪，初興九拒之謀；鑾輅親征，歸我一平之運。銜璧既輸於誠款，執珪尋列於朝班。感予在宥之恩，備罄資忠之節。圜丘展禮，齋莊見助祭之容；紫殿宴私，溫克盡爲臣之禮。綽有令譽，流於衆多。是宜特舉徽章，授茲節制，顯示優豐之澤，全其富貴之心。仍進戶封，永光闔寄。於戲！昔之孫皓，叔寶〔一〕，不聞分命於山河；近則孟蜀、李吳，止是流連於京闕。膺斯重委，斷自朕心。勉樹風聲，永蕃王室。可特授依前檢校太傅、持節房州諸軍事、房州刺史、兼御史大夫、充保康軍節度、房州管内觀察處置等使。闕。

《宋大詔令集》卷一〇三。

米信彰武軍節度使制

雍熙四年〔二〕

門下：人惟求舊，實有國之宏規；德貴日新，乃爲臣之亮節。

其有早推忠孝，宿秉端莊，方繫平塞之功，偶失貞師之律，雖行微譴，難抑壯圖，宜頒綸綍之恩，復授節旄之寵，庶觀來效，以贊丕基。具官米信，間世偉人，佐時飛將。百戰咸欽於果

毅，三軍早藉於撫綏。挺許國之純誠，皎如日月；著扞城之殊績，煥若丹青。自與帶礪之盟，實處腹心之寄。一昨救陷蕃之生聚，興問罪之車徒，資爾機鈴，覆其巢穴。雖原野頻經於苦戰，而貔貅久滯於長驅，既稽蕩定之期，須舉逗留之責。自從容於環衛，彌激勵於精誠。宜頒湛露之恩，俾復苴茅之任。往殿延安之重鎮，庶揚朔漠之雄名。美秩貴階，功臣并賦，併以授爾，予何愛焉！於戲！捨過從新，滌瑕蕩垢。非子果斷，不能明爾之深心；非爾忠純，豈得復予之慶澤？更懋總戎之遠略，佇成破敵之殊勳。勉荷鴻恩，無忘丕訓。可特授闕。《宋大詔令集》卷一〇三。

崔翰定國軍節度使制

雍熙四年〔三〕

門下：天子建國，必選賢而任能；諸侯有功，則加地而進

律。朕操文武之大柄，居華夏之至尊，名器無私，忠勞是屬。伊我良帥，時惟舊勳，爰旌坐樹之威，更建爪牙之寄。具官崔翰，韜鈴夙賦，仁勇兼資。挺鸛立之雄棱，有虎臣之英概。安民布政，則俗詠《甘棠》；訓士戒嚴，則風生細柳。邊事每勤於經略，壯心自許於國家。有宜降北闕之殊恩，臨左馮之重地。關輔素推於奧壤，旌旄用慰於來蘇。仍益爰田，併隆異渥。爾其冰霜勵操，金石推誠。慕辭第於前賢，追勒銘於往事。爲吾保障，賴爾腹心。永享崇高，勿忘訓誓。可特授闕。《宋大詔令集》卷一〇三。

〔一〕 孫：原闕，徑補。

〔二〕 四年：原無，據《宋史》卷二六〇《米信傳》補。

〔三〕 四年：原無，據《宋史》卷二六〇《崔翰傳》補。

六宅副使張茂宗可西京作坊使制

敕：具官張茂宗，嘗以文學，早策科名，爰自清班，俾從使職。謙恭周慎，所莅可觀；勤幹通明，何用不適。雖未周歲律，而益見時才，宜自副車之名，序遷繕工之局。表文武之兼濟，彰委任於踐更。勉答寵光，別伸殊效。《咸平集》卷二九。

前廉州刺史陳文顯可起復雲麾將軍制

敕：金革從權，禮典既稱於無避；苴麻易制，國恩宜茂於必行。具官陳文顯器識淹深，才謨明允，著公侯之名節，彰竹素之勳勞。寄重圭符，嘗布詔條之化；禮居苦塊，俾新編緯之恩。冀移孝以資忠，表奪情於優寵。《咸平集》卷二八。

馬守榮諸司副使制

敕：具官馬守榮，早列班資，頗聞恭謹；屢膺朝委，亦著勞能。向公罔怠於夙宵，莅事足專於才識。苟無勸賞，寧表旌酬。是用進階秩於明庭，列職司於近務。更觀勤恪，式副甄升。

《咸平集》卷二八。

永清彰德等軍節度使駙馬都尉王承衍男世隆

魏咸信男亮并加階勳如京副使制

敕：具官某男某，生於戚里，爲吾外孫。稟明訓於義方，昭令名於士範，才能可試，慶賜宜均。是用加珥貂騎省之資，帖執簡烏臺之秩。茂之勳賞，進以階資，莅於使局之名，命以副車

之職。勉圖成效，無怠寵光。《咸平集》卷二九。

西頭供奉官白守琪可崇儀副使制

敕具官白守琪：朕以儀衛之司，使副之職，必求公幹，用稱甄升。以爾自列班榮，亟膺任委，恭恪盡忠之節，周通莅事之能。備作彰聞，可以遷陟，式予職局，展乃時才。儻著勤勞，更茂光寵。《咸平集》卷二九。

東頭供奉官折御沖可崇儀副使加階勳制

敕：具官折御沖，早列通班，素彰勤績。祇命屢膺於任使，莅官備悉於器能，是用旌酬，以勸勞效。帖以省秩，兼之憲銜，仍觀適用之才，俾列副車之職。勉於忠恪，以答恩榮。《咸平集》卷二九。

端州防禦使李克文落起復依舊端州刺史充本州

防禦使制〔一〕

敕：具官李克文，明於韜略，真以幹能，弓箕克嗣於家聲，符竹早隆於邦寄。頃因禮制，俾奪哀情。洎喪紀以外除，茂朝章以斯在。任當禦侮。寵列頒條，眷惟高要之民，實佇撫臨之政。勉膺嘉命，無替忠規。《咸平集》卷二八。

〔一〕「制」字原無，依文體增。

朔州觀察使左驍衛大將軍趙希贊可泰州刺史制〔一〕

敕：分朕憂寄，頒於詔條；親吾黎民，行其風教。惟良之命，既難其人；作牧之榮，實重其選。以爾具官趙希贊，忠貞抗節，毅勇存誠；弓冶襲其慶靈，韜鈴著於績效。以拱衛腹心之任，委察廉風俗之能。邊鄙用寧，惇慤受賜。宜膺茂賞，別降璽書。淮甸之邦，漢符劇郡，命以俾乂，疇其允釐。佇騰襦袴之謠，達予聞聽；豈吝絲綸之詔，獎爾賢能。佩茲訓詞，孚予明命。《咸平集》卷二八。

授六尚書節度使麻

門下：國之喉舌，尚書實總於六曹；王之爪牙，連帥出參於十乘。在昔唯求於藩屏，我朝復藉於循良。自非文武之全才，莫預邦家之慎選。其有本由儒雅，兼著韜鈴，卻穀之《禮》《樂》《詩》《書》，義之府也；仲尼之俎豆軍旅，兼而有之，宜分經國之材，各受殿邦之寄。爰頒寵命，式表殊恩。具官某等，或天賦器能，或時推譽譔，揚歷盡試難之任，周旋居求理之朝。騰驤而龍駕，乾綱俱呈步驟；雍穆而鳳吹，律本共洽和平。暫留調鼎之恩，先授登壇之柄。進賢冠而納言幘，已峻朝端；仗黃鉞而擁白旄，更光儒道。仍加食菜，式重分茅。於戲！名器不可以假人，是予所慎；富貴弗期而驕至，在爾熟思。勉承出將之榮，勿辱知臣之鑑。往踐厥位，欽哉勛哉！可依前件。《小畜集》卷二六。

周瑩客省使劉承珪六宅使制 至道二年十一月

引進使周瑩，洛苑使劉承珪荐升軒陛，屢易炎涼，茂著徽猷，播在朝野。朕向者授之成算，咸董偏師，靜凶黨於西陲，走捷聲於北闕。眷茲亮節，宜示寵章，俾分掌於事權，仍并遷於使額。凡干重務，一以委之，內則兼密勿之司，外則總登聞之任，懲奸去弊，振領提綱。爾其明聽朕言，各揚其職，勉思盡瘁，勿忘訓詞。瑩可客省使，簽書提點宣徽院諸房公事；承珪可六宅使，同簽書樞密院、宣徽院諸房公事。并兼提舉司、登聞院事。《宋會要輯稿》職官六之一。

李延渥遷團練使詔 景德元年十一月丁巳〔二〕

昔漢祖思得猛士以守四方，蓋以知防秋備邊，國之重事，干城禦敵，勞而必圖，賞不踰時，人乃知勸。西京左藏庫使、知瀛州軍州事李延渥，選於近職，出守塞垣。屬□□之無厭，率控弦而入寇，長圍孤壘，急擊彌旬。延渥勗勵興師，鳩合衆力，親當

〔一〕「制」字原無，依文體增。

〔二〕景德元年：原作「乾德六年」。考《宋史》卷二七三《李延渥傳》：

延渥以真宗咸平六年知瀛州。景德元年契丹大舉撻邊，十月，抵瀛州城下。延渥率州兵擊之，殺傷甚衆。契丹遁去，死者三萬餘。驛書以聞，遷延渥本州團練使。事與此詔合。又《宋史》卷七《真宗紀》二亦云：景德元年十一月，「乙卯，遣使撫河北。契丹攻瀛州，知州李延渥率兵敗之。殺傷十餘萬衆，遁去。官吏進秩，賜物有差」。且乾德六年十一月無丁巳。據此，是詔當在真宗景德元年十一月丁巳。「乾」、「六」當是字誤。